



## Terenga 3: Hōtaka 11 – Tohutohu

Kei aku nui, kei aku rahi, kei aku whakatiketike, whakakukū mai ki te hōtaka o Ako. Ko tāna kaupapa, ko te whakatairanga i te reo kia rangona ai tōna waitī, kia mōhiohia ai he kura tawhito nō tuawhakarere.

### Hei Mahi Whakarongo

I a māua ko te kaikōrero e whai ake nei e tupu ake ana i Tokoroa, he wā tōna ka tohe māua. Kāore e kore he pērā katoa ngā tungāne, tuāhine o te ao. Ko taku tungāne, ko Rāhui Papa te kaikōrero mō te rangi nei. Heoi, anei ngā pātai hei ārahi i tēnei mahi whakarongo:

- 1) He aha te tikanga o te kupu 'kaiponu'?
- 2) He aha te hononga i waenga i te wahine me te whenua?
- 3) E tohe ana ia ki a wai?

### He Whakamārama

E titiro ana tātou ki ngā āhuatanga o te reo hei whakaputa i te hōhā me te pukuriri. Tuatahi, kia aro atu ki ētehi tohutohu.

Kāti te + *tūmahi/tūāhua*...

Kāti te *komekome!*

*Stop complaining!*

Kāti te *matapiko.*

*Stop being stingy.*

Kāti te *whakaparahako.*

*Stop belittling.*

Kāti te *tangimeme.*

*Stop being a crybaby.*

Kaua e + *tūmahi/tūāhua.*

Kaua e *pērā!*

*Don't do that!*

Kaua e *ūmere.*

*Don't yell.*

Kaua e *whakahīhī.*

*Don't be so arrogant.*

Tuarua, anei ētehi kīwaha hei whakaputa i te hōhā, i te riri rānei ki tētehi āhuatanga:

Kātahi rā hoki!

*OMG! Goodness me!*

Aii!

*Gee!*

Whakamutua atu!

*Stop it!*

Kai a te kurī!

*You 'so-and-so'!*

### Hei Mahi

**Whiriwhirihia te kīwaha tika hei whakautu i ia renga kōrero e whai ake nei:**

1. "Kāore au i hoko i te miraka, i te paraoa, i te nūpepa, engari i hoko au i ētehi rare māku."
2. "Kua mauheretia a Pita he auau nō tana taraiwa i a ia e haurangi ana."
3. "I whakapau a Hiriwa i ngā moni i kohia e te whānau hei whakapai i te marae."
4. "Ko au kē te tamāhine ātaahua katoa o ngā tamariki a Whero rāua ko Huri."

### He Whakautu:

1. Kātahi rā hoki!
2. Aii!
3. Kai a te kurī!
4. Whakamutua atu!